



PRIMEIRU MINISTRU

DISKURSU

SUA EXELÉNSIA PRIMEIRU-MINISTRU

KAY RALA XANANA GUSMÃO NIAN

**IHA OKAZIAUN SESAUN ABERTURA 5.º FÓRUM ENERJIA, MINERASAUN HO
NEGÓSIUS TIMOR-LESTE 2025**

JL World Hotel, Díli

24 novembru 2025



Palácio do Governo,
Avenida Presidente Nicolau Lobato,
Díli, Timor-Leste

Belun sira,

Ho laran haksolok boot tebes mak ha'u hato'o ha'u-nia boas-vindas ba ita-boot sira iha 5.º Fórum Energia, Minerasaun ho Negósius Timor-Leste nian ne'e.

Fórum ida-ne'e hanesan prinsipál plataforma anuál país nian atu apresenta atualizasoens no promove debate kona-ba ami-nia setór energia ho minerasaun, no mós kona-ba oportunidades ne'ebé iha ba empresas ho investidores.

Hanesan oportunidade di'ak ida ba partisipante sira bele hatene kona-ba oportunidade hirak-ne'ebé Timor-Leste oferese, no mós ambiente favorável ba investimentu.

Timor-Leste alkansa ona progresus extraordináriu, bainhira haree katak ami hahú husi zero foin liu duas dékadas. Ami harii daudaun Estadu pasífiku no demokrátiku ida, ho sosiedade ne'ebé aberta no ukun nu'udar Estadu-de-direitu.

Ami iha ekonomia ida ne'ebé aberta no iha kreximentu ho Governu ida ne'ebé fokadu iha dezvoltimentu sustentável no iha intereses nacionais ba longu prazu.

Ho orgulhu boot mak Timor-Leste adere ba Organizasaun Mundiál Komérsiu iha tinan uluk. Tama iha OMK reforsa tan ami-nia governasaun ekonómika no proporsiona regras klaras ba setór privadu, hodi aumenta konfiansa iha komérsiu no iha investimentu iha Timor-Leste.

No, iha fulan liubá, Timor-Leste realiza ona aspirasaun nasionál ida ne'ebé kleur tebes ona atu sai hanesan 11.º membru ASEAN – rejiaun ida hotu iha mundu ho kreximentu lais liu.

Ami-nia partisipasaun iha ASEAN hatuur Timor-Leste iha pozisaun privilejiada tebes, atu bele sai hanesan polu estratéjiku energia ho minerasaun iha Sudeste Aziátiku.

Ami mós riku iha rekursus jeolójikus, iha rai no iha tasi, no ami empenhadus hotu ona atu dezvoltolve rekursu hirak-ne'e ho forma previzível, transparente no responsável.

Dezvoltimentu nasionál orienta tuir ami-nia *Planu Estratéjiku Dezvoltimentu 2011–2030*. Planu ne'e define vizaun ida ba longu prazu kona-ba diversifikasaun ekonómika, dezvoltimentu umanu ho investimentu iha infraestruturas atu harii nasaun ida ne'ebé próspera, instruída no saudável.

Ami identifika tiha ona setór estratéjiku tolu atu promove empregu ho investimentu: turizmu, agrikultura ho enerjia no minerais.

Ida dahikus ne'e materializa iha Projetu Tasi Mane, ne'ebé engloba Baze Abastesimentu Suai, Polu Integradu Dezenvolvimentu Petrolíferu Natarbora — ho unidades LNG no éliu, refinaria ida ho instalasoens marítimas — aleinde sentrá elétriika Betanu ho infraestruturas ne'ebé iha ligasaun, inklui lokalidades foun, estradas ho pontes.

Ami harii aeroportu ida atu apoia Projetu Tasi Mane ho autoestrada prinsipál ida. Ami fó apoiu orsamentál boot lahalimar ba infraestruturas adisionais no ba estudus ho planus nesesárius ba dezenvolvimentu indústriia.

Projetu Tasi Mane sei sentra iha dezenvolvimentu Greater Sunrise — kampu gás ida ne'ebé seidauk dezenvolve maibé boot liu iha ami-nia rejiaun.

Estudus independentes konfirma katak Greater Sunrise oferese retornus finanseirus substansiais ba investidores iha dékadas hirak laran.

Dezenvolvimentu Greater Sunrise sei lori mós benefísius nasionais, inklui empregus, reseitas ba longu prazu ho kriaun baze industriál ida iha kosta sul (ka, tasi mane).

Pozisaun Governu kona-ba Greater Sunrise klara nafatin.

Gás naturál husi Greater Sunrise tenke prosesa iha rai, no iha Timor-Leste.

Ne'e esensiál tebes ba dezenvolvimentu nasionál. Sei permite kria oportunidades foun ba joven timoroan sira bele hetan kompeténsias, partisipa iha indústrias emergentes no kontribui ba forsa iha ami-nia país ba longu prazu.

Sei garante atu ami evita “malisan husi rekursus” — prosesamentu iha rai sei permite valór ne'ebé jera husi Greater Sunrise bele hela iha Timor-Leste hodi apoia konstrusaun nasaun.

Sei reforsa ami-nia seguransa enerjética, sei apoia indústriia no sei kria millares empregus ba ami-nia joven sira.

Baze téknika husi ami-nia pozisaun metin tebes. Avaliasoens espesializadas konfirma katak bele harii gazodutu ida iha bee kle'an husi kampu boot ne'e, dada to'o iha ami-nia kosta sul, tuir padroens internasionais enjeñaria.

Timor-Leste sei fornese infraestruturas apoiu necessárias ,inklui Baze Abastesimentu Suai ho instalasoens iha Natarbora.

Ami sei kontinua totalmente empenhados atu avansa ho Greater Sunrise ho forma ne'ebé komersialmente sólida, teknikamente rigoroza no aliña ho ami-nia povu nia interesses.

Señoras no señores,

Timor-Leste identifika mós ona oportunidades foun iha área minerasaun ho minerais krítikus, inklui ouru, kobre, magnéziu ho rekursus seluk.

Dezenvolvimentu ami-nia rekursus minerais iha rai sei promove diversifikasaun ekonómika, reforsa kompeténsias técnicas ho kriaun empregus foun, liuliu iha comunidades rurais.

Ami estabelese ona regras klaras ho kuadru jurídiku sólidu atu orienta dezenvolvimentu setór mineiru no garante serteza ho konfiansa ba investidór sira.

Durante Fórum ne'e, ita hotu sei rona reguladór ho investidór sira kona-ba oportunidades disponíveis iha minerasaun ho minerais krítikus, no kona-ba papél ne'ebé sira bele dezempeña iha apoiu ba dezenvolvimentu nasionál.

Señoras no señores,

Povu Timor terus barak tebes iha nia luta ba autodeterminasaun. Hetan tiha independénsia, ami servisu maka'as hodi harii país ida ne'ebé pasífiku, estável no demokrátiku.

Agora ami hasoru dezafiu foun ida: dezenvolve ekonomia ne'ebé forte no sustentável no bele garante bein-estár ba ami-nia povu.

Dezenvolvimentu Greater Sunrise ho kreximentu iha ami-nia setór minerál mak sentrais tebetebes ba esforsu boot ne'e. Projetu hirak-ne'e, sei hametin ami-nia ekonomia, proporsiona reseitas esensiais ba Estado no sei kria oportunidades ba ami-nia populasaun joven.

Governu sei halo buat hotu ne'ebé bele, atu konkretiza vizaun boot ne'e.

Tanba ne'e, mak ha'u apela ba maluk sira hotu atu partisipa ativamente iha Fórum ne'e. Atu imi bele hatene oportunidades ne'ebé Timor-Leste oferese, halo diálogo ho

representantes governamentais no responsáveis políticos, halo kontaktus ho líderes setór ne'e nian no explora parserias foun ho oportunidades investimentu.

Hamutuk, ita bele tulun malu harii Timor-Leste ida ne'ebé forte, bele oferese futuru di'ak liu ba ita-nia povu no reforsa soberania ita-nia Estadu nian.

Ha'u deklara katak loke ona 5.º Fórum Enerjia, Minerasaun ho Negósius Timor-Leste.

Obrigadu barak.

Kay Rala Xanana Gusmão